

四庫全書

集部

欽定四庫全書

相山集卷六

宋 王之道 撰

七言古詩

送神童胡元弼元英從其父胡庭俊歸秋浦

西湖清麗春雨餘子今欲去其馬如九華插天遠在望
三月不見愁容舒二兒犇逸汗血駒輩視長離與鷓鴣
去年冒雪來其俱一鳴上國驚羣儒書不負人人負書
公卿豈應終犁鋤惠然過我騎甚都蕭蕭晚吹飄襟裾

借問能留旬月無吾亦理棹其歸夫為言與君不同塗
藹峯松竹鳴笙竽竒童小友良不誣異哉老蚌生雙珠
君之是行亦榮歟三胡盛事喧州閭

和王覺民松軒詩

蒼髯綠髮三四椽茅齋高下輕且軒清風入夜可人意
來與夫子調朱絃連日秋陰蕩殘暑抖擻煩襟欲輕舉
簡編燈火置勿論且快蛟龍得雲雨

追和東坡郭熙秋山示王覺民

平生最愛烟水閒不知歲月磨江山干戈七載厭奔走
清霜夜入飛蓬間我家山水擅平遠未向郭熙見秋晚
驚鴻斷處抹微雲野水盡頭橫翠巘林塘綠淨明拒霜
似與楓葉驕秋陽東坡山谷妙言語珠玉倍增山水光
亂離記得承平日政出多門事如髮傷心北犄歸何時
園苑荒涼萬年石

次韻袁望回見贈兼簡楊德潤

長堤十里荷花雨隱約塵頭南去路故人戀戀不能忘

又遣長須寄新語錦囊玉軸纏朱絲開緘恍覺雲烟飛
青山未許松柏老綠野會致牛羊肥嗟予衰滯煩訾相
十年相對江湖上苦吟猛省爆鴨脚劇論旋驚爛熊掌
分攜令我重回首日月漂流易成久因風頻寄數行書
毋蹈從前作詩瘦比鄰先生倦不出德齒俱尊時第一
何妨杖屨日過逢白酒黃鷄醉秋色

按麥行和魏定父韻

號啼莫怪妻兒疎麥秋恰了償官租噓嚕濕沫魚在陸

傷時令我思唐虞平生學易有何說大要豐財貴知節
相扶相吊來流亡問言豆葉何時黃遠哉天道所不曉
人比前年孰多少

清江引用蘇養直韻示王覺民

荷葉亭亭綠滿塘秋炎深得蓋鴛鴦晚來江上西風急
收拾蓮紅付拒霜萬山搖落見森樾翠影蕭蕭冷梳髮
請君無作宋玉悲來賦江樓望明月

清江曲追和魯直韻

鬢邊殘雪幾春秋自說生來不解憂
晚食得魚吹荻火秋盤尋筍艤松舟
布裙斗酒不須惡明月清風且相樂
紫宸朝去醉眠時初日寒林正搖落

追和蘇養直飯牛歌

時來富貴非所憂公卿何必皆黑頭
力田孰若逢有秋異哉甯戚親飯牛
商歌未絕驚齊侯遂從仲父盟葵丘
勲業無聞死不休磻溪有叟垂直鉤

次韻陶監丞茂安見贈

三年重見須川湄捨舟東去何驅馳王事靡盬莫遑息
人生所貴心相知經從往返兩過我一言意厚何多為
向來江夏傾蓋日翕然譽望推麟儀才猷伏火丹九轉
用之功效堪扶衰重陽初過雨新霽乾坤六合方平夷
邊城殘寇何足滅廟堂勝算那容窺相逢問我出世法
嗟我茅塞同荒陂因君扣擊發深省沉迷可笑羣昏隨
我聞摩詰老居士後身樓至今王維忽然惠顧有緣契
恍若宿霧青天披願君為我取妙善此界示現無邊慈

和成都張通叔韻簡范偉明

高樓半天夸奕奕一室蕭然再經昔君今盤礴知幾時
邂逅相逢俱是客襟懷磊落我輩人傾盖便覺情相親
欲知富貴未乾沒岷山錦水鍾精神范侯國學同舍友
聞與吾人最親厚別來不寄一行書有便何妨為予取

贈蓑衣道人

蓑衣道人七年凡兩見於西湖之上是行謂予會
當晚達且遇異人則予心之所庶幾而不敢必者

道人丐予數語故茲及之咄哉彼以妄言之我以
妄聽之識者能無謂乎己卯三月二十五日

七年兩見西湖濱似向賤貧求貴人安民扶世在豪傑
貴人何必皆巖莘嗟予坎壈今老矣餬口相煎未能已
願君莫作貴人看歲晚庶幾長不死

寄白香巖縣丞

香山譽望不可攀香山之後傳香巖香巖硯聳人目
香巖秀氣超塵凡香巖之風清可掬終日哦松適幽獨

媿我無能老杜門何時一笑披青雲

題魏古老若水軒

世情孔甘似醇酒沾沾未必應心口覆手為雨翻手雲
餘耳安能保長久魏侯風味真可人汪汪萬頃江湖春
相從卅歲今白髮坐對小軒聊欠伸

和沈次韓王覺民韻

二公才致同清壯顧我無能但蘄向只今連壁復有誰
伯仲未可輕第行小人老矣病且衰目光近在牛背上

何當策蹇擬高談歲晚寒雲連雪障

教授顏端行出示所和老杜曲江章因次韻

浮雲捲盡秋天高月光照水翻金濤臨溪酌月羞溪毛
舉杯未飲欲誰酬茲非沈謝須劉曹

清夜無眠想千古一字茫然墮沙莽賢否紛紛固難數
樓頭漏聲寂不聞策策寒窻葉鳴雨

富貴從今信在天君看黍稷多秋田金風玉宇秋無邊
白屋青雲朝暮耳正如農父須逢年

定慧院海棠追和東坡呈虞季然陳德夫

春來何處無花木偶向招提見君獨一枝着雨濕紅粧
便覺羣芳自塵俗嚶嚶幽鳥競遷喬皎皎繁駒聊在谷
人生富貴會有日莫以青雲輕白屋固應遺策暫駐馬
況復過屠宜得肉無心杜老吟不到半醉楊妃睡難足
態濃意遠誰得似空想當年麗人淑嗟予坎壈世所鄙
正坐甲子無背腹少甘糠乾老葵藿自笑清癯類霜竹
看花把酒發浩歎反復新詩三過目仇池老人已仙去

千載東坡與西蜀思之展轉不可見夜夢乘風跨黃鵠
朱唇翠袖妙今古我欲宮商歌作曲翻愁刻鵠難復工
唐突西施却成觸

次韻寄荀晉仲簡陳夫子

二老亭亭雙屬玉交映霜餘半溪綠才高一世妙言語
落筆珠璣爛盈掬時來釣叟為三公傳巖莘野誰雌雄
紛紛俗態任冷煖風雲早晚騰蛟龍中興復見宣和盛
須信人心協天命真從僵仆正邦基更向膏肓起民病

尺書寄我三長篇管中窺豹非其全墨渝紙敝未釋手
晴窗飛盡沉香煙嗟予留滯濡須塢夢寐斯文屬燕許
何當單騎造齋榻遂使高軒出城府春風回首歸萌芽
又促畦丁種早瓜我心傾寫會有日為言已辦浮江槎

再用奴字韻寄李廷吉

廷吉行縣過敝廬出其里人項君佳句屬予俾和
將以寄項君子雖不識君面觀其詞意字畫必修
謹樂善之君子也勉賦一章卒簡項君為異時相

見撫掌一笑云

霜餘菊暗荷葉枯千頭喜見君家奴
離離丹實照綠葉不減五松官大夫
邇來萬木凍欲死東君信到梅花鬚
一枝亞竹斜照水便覺清香無處無
李君江南我江北正如員嶠鄰方壺
操修迥與世俗異政事賴有神明扶
文書甚簡民甚喜老吏往往寒無襦
項侯秀發西楚後作詩語帶山仙癯
願因徐辟見孟子折簡未敢先招呼
異時鼎社遂酣暢會使王衍悲黃壚

酬秦壽之見贈三首

人言韓孟才相高欲將詩骨追詩濤可憐寒谷瘦不毛
青蒿倚松亦浪語遂令後世稱同曹

誰能冒次澆今古老去蓬茅雜榛莽樸遯已甘無足數
品題忽及乃君餘頗覺焦枯得時雨

靜中真樂全吾天勿輕捨已芸人田甜均食蜜無中邊
濁醪麤飯自不惡那能問命推行年

江天暮雪

凍雲垂地風栗冽萬里江天暮飛雪九華何處正嶙峋
瓊樹瑤林鬪明潔扁舟突兀依寒蘆朝來殘酒猶半壺
夜寒獨酌不成醉卧聽宿鴈鳴相呼

瀟湘夜雨

短篷暮艤湘江宿坐見江豚起還伏忽然氣作浪山來
一夜雨聲如決瀆淒淒寒氣欲相侵燈火青熒更向深
床頭有酒且徑醉免使萬慮縈吾心

洞庭秋月

扁舟夜泊蘼葭側湖外雲間見明月月光搖水掣金蛇
坐想騷人賦秋色舉杯向天屬姮娥君當照坐吾當歌
全勝送客九江上荻花楓葉如渠何

漁村落照

寒蘆萬頃迷西東夕陽上下江天紅炊烟幾處裊輕碧
知是漁家收釣筒老翁長鬚更廣顙路逢百錢掛藜杖
三杯酒罷月已高短棹扁舟還獨往

平沙鴈落

雨餘湖水吞遙空前山宿霧開溟濛坐看鴈陣落沙觜
欲下復起摩蒼穹寒蘆飛花秋色老亂撲客衣紛不掃
肅肅驚風忽破行却似張芝作顛草

和笑庵送麴

深堂傑閣松風鳴黃梅已過雙溪晴不知城市乃有此
六月表裏冰壺清我來蒙師炷香鼎旋汲溪泉為煎茗
明朝又送不托材大慰枯腸怯龍餅

贈堅上人

堅上人以竹齋居士所贈岷峩圖詩來求鄙句為
賦之繼其韻也

岷峩何處在目前恍惚萬里惟心田道人遐想對縑素
毫端疊疊生雲烟不煩捫參更歷井坐見紫翠摩蒼天
崔嵬絕頂明積雪崎嶇幽澗縈流泉當時神禹導江處
隨山刊木知何年竹齋言語妙天下山情水思何繇繇
想當落筆快揮掃精神如到岷峨巔師誠乞詩我丐畫
不然無用徒相煎

寄古上人若之用東坡徑山韻

寄語山中好看客待與諸郎醉秋色諸郎作詩學東坡
筆力駸駸清到骨由來習氣相薰蒸千古勾吳張季鷹
鱸魚斫膾飲入夜哦詩坐對風窻燈好向少陵賡客至
樽酒盤飧正相似請師淨掃壁上塵準擬臨時醉題字

送道覺遊天童山

小雨新晴接重九獵獵西風振衰柳二禪過我欲東遊
為說偕行得良友天童老人笑垂手應問師來欲何取

相逢莫作一日留袖取鄞江過淮右

四祖山

黃梅西去一舍許奔走龍天瞻四祖師今何往昔何來
占斷金沙長作主須知至道本不滅豈獨高名固非取
偶傳衣鉢繼三世遂配雲中詔千古寺藏巖腹蟠地軸
塔據峯巔立天柱稜層石棧斜甕玉繚繞溪流緩縈組
月明飛瀑百虹掛風撼長松萬蛟舞路通澗谷橫略約
樹靄烟霞團縷數清陰掃徑初入夏蒼蘚封庭新過雨

留連歸客獲聯轡邂逅主僧還接武請觀異事花五葉
願結勝緣香一縷何人為作錦鷄夢此意他年銘肺腑

欽定四庫全書

卷六

欽定四庫全書

相山集卷七

宋 王之道 撰

五言律詩

和荀晉仲題法隆韻

去來何所喜一雨應澄清
憔悴有生理嘆嗟成頌聲
酒壚從客醉村疇問農耕
深得諏詢意誰能繼此行

和沈進可檢法秋夜飲客待月

欲雨雲容合瀕江水氣浮
笑談初入夜燈火適逢秋巧

借三豪便還成一醉謀投瓊酬木李祇使老夫羞

冬夜對月懷彥逢弟

荒庭寒有月窮巷靜無聲坐想積年別遙同今夕明
蹉跎前進士憔悴老書生短棹歸來好邊城久偃兵

和沈次韓歷陽歸來見寄

臘近梅爭白冬溫柳漸黃強吟詩思澁幽步野情長
別去嗟何濶歸來肯遽忘開緘得佳句和氣溢寒鄉

和魏定父

十里南溪路思君一望間黃花秋色老紅葉露痕殷似
說親朋集遙知杖屨閒徘徊松徑晚踏破紫苔斑

和子遠官牌夾口韻是日聞官軍破虔賊

滯留嗟是役艱險笑吾生此去和風順朝來虔賊平湖
山爭喜氣鴈鷺送歡聲千里前塘路應知客念輕

和劉興可二首

老來無柰懶春至不勝情萬石嗟遺迹雙魚謝寄聲壓
花朝雨重醺酒夜泉鳴細把君詩讀冰壺表裏清

野塘春草遍芳樹老藤纏遠信占黃耳清游任白顛山
光晴抹黛湖氣暖騰烟我有邊韶癖何妨晝日眠

和歷陽李簿見寄

短鬢紛垂白衰顏悴帶黃多寒冬更甚少睡夜能長舊
學長荒廢新知感受忘何時一樽酒談詠帶江鄉

和因格非見寄二首

青山如我約終日對柴門學道未忘念懷君空斷魂時
來當有用事往置無論反覆新詩讀誰知老眼昏

兀坐時看屋閒居畫掩門吳吟聊遣興楚些欲招魂石
泰宜周易行藏付魯論不須傷老大眠食度朝昏

和程德遠二首

寓問發函舊論交傾蓋新幾年瞻翰墨今日侍光塵禦
侮煩驍將扶顛倚大臣相逢更可恨對酒漉陶巾

未盡通宵話猶如一日秋壯懷天共遠歸意雨同留燈
燼何明滅蛩聲靜應酬十年為客夢應不負瀛洲

追和老杜江上

獨坐日將夕淒淒風雨秋寒燈照孤屋歌捐擁踈裘身
世槐安國功名蜃化樓歸歟老居士蹤跡繼浮休

和彥時兄贈王廣濟

往矣古循吏賢哉今長民牛羊歸落日桑柘殿餘春共
學知名久相逢見面新瘡痕賴休養猶喜見斯人

和王覺民簡褒山因上人棗嶺魏欣然二首

七行才業在寧久困無津秋到搏風翼春迴縱壑鱗褒
山方競秀棗嶺益爭新珍重二三子詩騷追古人

君來踰半月未果一尊同湖水寒應碧山梨雨自紅何
時過北牖今日轉西風相去無他地孤城杖屨中

酬陳勉仲勉仲寄示諸公所和黃字韻詩軸且
責其歸重念匹夫懷璧之罪不敢靳因復和其
韻反之

失梳蓬鬢結欠洗垢衣黃我欲齊榮辱誰能較短長賤
貧猶不去富貴慎無忘豈敢貪懷璧春秋戒越鄉

和秦壽之題靳春驛浸月軒

千山初過雨萬籟不鳴風寶鑑沉寒水冰輪上太空竹
梢低蘸碧楓葉冷浮紅終欲金沙去經營一畝宮

吳興舟中有作

大澤知何處扁舟快此行綺羅紛勝賞歌吹溢歡聲
葑春還合波濤暮自平臨風一披拂誰識未歸情

遣興

長沙
漕治

步屨隨兒輩臨池得凭欄久陰東虹斷小滿北風寒點
水荷三疊依牆竹數竿乍晴何所喜雲際遠山攢

和龔聖任冬日即事

老怯繁霜勁閒憐愛日溫禦寒朝強酒防寇夜撐門採
薺籬根地觀梅郭外春餘生何所託歸命大慈尊

和秦壽之題黃州郡樓

西北張霞綺東南漾月波登臨筇作馬吟詠筆翻河思
與蒼霞遠情同白水多新詩清且麗標致壓陰何

和子遠春江用老杜韻

欲去未成去朔風鳴怒濤片帆洲外舉列岫霧中高竹

屋雨沾被紙窓寒透袍遥應望歸艇向夕走兒曹

送彥逢弟赴西興鹽場

聞道西興去全家共小舟別離江北岸懷抱海東頭
閃閃風帆遠滔滔雪浪浮苕溪在何許應為故人留

送安豐判官江叔夜用菊花韻

冬溫行色好江上菊花黃鄉味尊羹美皇恩誥墨香
招延從北海吟咏繼東陽別後如相憶時應問草堂

秋日喜雨題周材老壁

大旱彌千里羣心迫望霓
簷聲聞夜溜山氣見朝隤
處暑餘三日高原滿一犂
我來何所喜焦槁免無泥

立春和孫子紹二首

老窮推不去湖海又逢春
懶復論三甲空驚薦五辛
柳梢寒已動萱草暖還新
我亦橐中物因君試問津

南浦初開凍東郊未去寒
芳華歸草木生意入門闌
綠蟻供瑤甕青絲送玉盤
新詩妙當世賦答敢辭難

題許公寨驛

畏景還迎日追涼偶遡風泉聲山上下松影路西東遠
覽心猶壯清吟語自工雨多何所喜郡國慶年豐

和魯如晦春日過定遠山口

雨足塍塍水春晴處處花畏塗雙隻堠荒戍兩三家心
折朝鳴鹿魂驚暮集鴉想君行役苦愁感不成嗟

丹陽湖阻風二首

水濶風還怒舟輕浪更顛雲容初過雨湖勢欲吞天沙
觜青楓外魚罾白鳥邊夕陽應到岸沉醉酒家眠

老去心猶壯詩成喜欲顛時危思報主窮極待呼天歸
夢先湖外離情到酒邊晚來風更惡舟卧不成眠

和潘澤之沈元吉泛舟湖上

散騎真前輩休文即當家泛舟成麗句散綺見餘霞驚
去沙鷗沒招來酒旆斜春歸何處覓籬角見金沙

贈嚴彥醇

一別三年久重來兩鬢蒼瘦筇扶蹇步新茗攪枯腸得
句情還適逢人話頗長湖山元不改喪亂我心傷

中秋

靜院三更雨樓臺一點風
新詩愁恨裏故國夢魂中
節物它鄉異交情我輩同
眼前多怪事咄咄強書空
出戶喜折屐江天來翠岑
看雲忘久立待月動微吟
闌塞重回首簡編勞繫心
琴中有山水應解遇知音

題北莊用陳勉仲韻

幽亭臨水竹云是使君莊
秋霽來觀稼春融賦採桑
納涼供芡實載酒摘蓮房
坐得牧民術也應如牧羊

用陳阜卿勸農韻呈宣城太守

何處催耕早宣城刺史先旗麾明曉市耒耜徧晴川道
路歡聲接樽罍麗景鮮似聞携百榼分餉及高年
欲知人意喜萬戶鬱爐煙紗帽花垂額金卮酒到蓮
豐端可卜農勸競相傳往矣南陽政今追召父賢

燒火用陳西麓韻

燒火驅寒去銜杯待暖回家書萬金值懷抱一時開臘
雪猶棲樹風光已着梅相過隨處好未怪損梅苔

題黃梅驛舍壁間

石潤占梅雨山寒應麥秋清風鳴翠篠疎雨濕紅榴古
驛苔封砌荒城柳映樓高吟一甌茗聊為故人留

太湖呈邵公晉沈元吉

半月江湖上晚來方得風掛帆誰共快到岸偶相逢可
是過從舊都緣臭味同長亭一樽茗親厚意何窮

秋夜對月

青廓經新雨扶疎桂影秋夜涼山色靜風細水光浮坐

久因忘寐詩成得散愁願言乘此興同賦庾公樓

春日無為道中

旱甚山光暗風顛日色微桑芽蟲翅小荻筍羸肩肥野
寺看題壁村壚問典衣春容良不惡楊柳正依依

歸自合肥于四頂山絕湖呈孫仁叔抑之

達岸三時頃瞻山四頂賒喬林知馬尾亂石見鰲牙水
脚浮青靛湖脣混白沙漁人收罽網歸去日西斜

呈蔡元德二首

別來閒計日一日似三秋顧我無能老逢君始欲愁詩
情今轉勝交契久還稠學問神龜似當年繼踐猷

一葉黃梅雨潺潺過麥秋昏沉渾似醉憔悴不禁愁渠
溢門庭淖園荒草樹稠乍晴酬絕唱何幸對風猷

蒙城早行

殘月千家閉荒城萬竅號舉頭華蓋近回睇啟明高野
迥霜迎面風清冷透袍十年河上路從此步金鰲

固陵道中

道路榛菅合裝齋咫尺迷陟岡還見塔下阪忽逢溪迥
野鳴朝麕踈茨撼午鷄固陵何處是弛擔日應西

廣濟道中

曉日掛林麓秋風入澗阿野禽飛自語田父笑相過村
踵倉箱富山蹊芋粟多一鞭聊策蹇馳上小羅坡

沙窩道中

十里沙窩路晴雲向暮開褰裳九過水駐馬一觀梅歲
晚松篁茂山寒虎豹哀不因王事迫誰肯此間來

舟過三丫河

搖落蘼葭浦荒涼鴈鷺村
吳柑迎齒冷魯酒著顏溫
水澁風還逆天寒日自曷
不堪歸思亂烏鵲鬧黃昏

過白羊市

小市環農畝長橋接佛宮
扁舟帆影日幽鳥柳陰風
沙觜淺深水樹梢紅白茸
乍聞秋糴賤吾亦慶年豐

立春示兒二首

雪盡適霑雨臘窮初得春
上冰魚意樂出谷鳥聲新
便

覺風光好何憂活計貧一樽聊共醉踈率見吾真
朝來何所喜人唱玉樓春酒著心還壯詩成思轉新士
衡寧久困曲逆豈長貧千載風雲會欣逢聖主真

追和李義山賦菊二首

嫩萼猶封綠繁英已醉黃雨餘三徑晚秋到一枝香滴
滴盈朝露暉暉映夕陽何妨浮玉筍共醉木蘭堂

團團青蓋小拂拂御袍黃翠葉凌霜秀繁英浥露香浮
觴追北牖飲水記南陽采采東籬下行歌對草堂

和沈次韓秋日雨後督子厚報

江檻連朝雨山齋昨夜涼不知新稻熟深怪晚炊香得
句君應喜聞風我漫狂繡溪行樂處雲水幾千章

欽定四庫全書

相山集卷八

宋 王之道 撰

五言律詩

秋日即事三首

晚來何所喜
急雨洗新秋
幸遂登高賦
應容遇勝留
藕花明遠近
鷗鳥任沉浮
不用揮紈扇
何妨醉玉舟

今日知何日
西風正得秋
天心方祚漢
人物合師留
才畧煩威敵
聲名賴鎮浮
不妨臨賦樂
汎汎有揚舟

俛仰黃花集澄清九月秋預愁新任迫難為故人留嵐
去山光合江迴水氣浮何當脫羈絆同辦五湖舟

雪晴三首

雪壓千山淨雲披萬里晴木冰爭霽色簷雨碎寒聲靜
映吟牕冷輕浮茗椀清最宜今夜月來借短檠明

湖山開宿靄院落快新晴滉漾溶銀色潺湲過雨聲味
增茶品勝光奪月華清放出東牆角梅花數點明

氣暎寒日曉光照遠山晴鄒谷有春意袁門聞履聲映

書何自苦炙背不妨清邂逅逢詩將高吟眼倍明

和余時中元夕二首

今夕知何夕熙熙萬室春歌樓醒醉客燈市往來人
勸酒行杯促聯詩得句新銅壺休見迫歡笑正相親
羅綺行歌夜杯盤坐笑春舞衫催急管步障擁佳人
燈火珠星粲樓臺壁月新傳柑良可樂黼座玉音親

次韻魯如晦七夕

今夕知何夕相逢莫漫愁涼颼開北牖新月挂西樓重

惜經年別貪延數刻秋明朝河漢隔西向望牽牛

秋日郊行

斷橋臨野水疎屋見人家嫩綠幾畦菜深黃三徑花
斷雲行自逐征鴈望還賒好訪韓湘去山林養白鴉

閒眠二首

乍暖經行久新涼出浴初酒酣春晝永食飽午鐘餘
我懶喜聊復君閒應樂胥年來苦奔走此味竟何如

秋懷一事無暑盡晝涼初竹戶靜長閑藜牀安有餘逍

遙化蝴蝶容易入華胥天上多官府神仙恐不如

閒居

五斗不爾競一區聊自營閒看探花信靜坐聽松聲約
客酒初熟訪僧詩漫成有時過閭里往往競邀迎

獨步

飽餘惟欲睡散睡步東園雨足富蓮子年豐多稻孫崎
嶇窮竹徑詰曲遍花源何必冠童輩偕來笑語喧

逍遙堂二首

獨坐虛堂寂煙銷瓦博山出游魚自樂飛倦鳥知還花
氣清風遠槐陰白晝閒逍遙入詩思落筆笑談間
娜婀風前竹空濛雨外山孤雲心共遠短艇興俱還酒
有雙蓮勝詩無一字閒因君成悵想時到夢魂間

飽食

予亦屬厭耳女寬何嘆三一簞儻知足八珍自忘貪駝
峯擅西北瑤柱誇東南但願無是餒藜羹非我慚

放船和子遠韻

冬溫寒日好歲晚早梅開帆腳隨風轉江流與岸迴坐
憐青嶂遠靜見白鷗來水驛三千里斯游亦壯哉

追和東坡倦夜一首

風閣開還閉龕燈暗復明竹間聽露滴庭際看雲行皎
月千門靜微風一座清只今廷諍者誰復繼元成

和子遠泛江送客用老杜韻

北風還入夜波怒未能平江氣雲煙重山光水墨輕
熒漁火亂慘慘暮寒生咫尺淮鄉路淹留繫此情

久客和子遠用老杜韻

舟解風還順江神亦世情
滯留三月過攀送一帆輕
行止關吾道窮通任此生
梅梢春已動冰雪漫縱橫

歷陽倅蒙菴鄭公卒於位
記歲在丁丑與僕有
交承之契方來自鎮西
而僕亦自安豐往邂逅
於合肥驛中獲為三日
之款所談無非周易太
玄老莊之書開警蒙昧
多矣公平生學佛行一
着端的不昧所謂毫髮
無遺恨者僕老矣請從

其後而為淨土之游似不晚也作是詩以弔之
我倅安豐日君來自歷陽交承分彼此邂逅及行藏精
義通玄易微言妙老莊刹那今十稔歎仰未能忘

東晉陶元亮西京董仲舒高風敦薄俗妙論見遺書水
石傷新窆松篁慘舊廬楞伽今在否此道發明初

楞伽達磨

以授二祖東坡謂讀者或不能句而公嘗
註是經想見公於此有得云恨未之見

哭韓積中二首

命矣窮張籍歸哉病長卿焦湖家自遠畏日我同行想

像分攜處依稀聲歎聲仙踪向西路回首淚縱橫
多能傾相府高義著房州脫畧通侯貴追隨逐客遊敢
論當世比曾向古人求悵悵今樓護黃泉已再秋

哀陳夫子

不見陳夫子依稀四載餘云亡前日信報葬幾時書玉
軸千篇在牙籤萬卷儲九原應有恨新第落成初
去矣君何速聞之我重悲席塵埋古鼎書蠹入新詩鴻
鴈嗟安仰扮揄痛莫追木瓜慚未報臨紙涕漣漣

哀湯與立父

薄俗久不競丘園多逸民聞君輕去世令我重沾巾一
夢苕溪曉千年石堵春人情不能已南望哭江濱

一門今七世誰復似君家盛事追公藝高風映伯華板
輿方就養玉樹遽興嗟叔子今何在魂應到馬牙

尚記宣和末賢科擢阿戎義方傳輦下士譽走江東賀
厦心雖切披雲意自忡思君想眉目悲咽對西風

哀徐朝義恭人潘氏

愛子心惟壹，宜家語不煩。
雨添南澗藻，風偃北堂萱。
鬱鬱今同穴，詵詵正滿門。
善哉摩頂記，歸奉大慈尊。
城見三千歲，人終八十春。
從夫安樂近，拜佛率陀新。
婉孌書彤管，淒涼歎棘薪。
中郎有賢子，遺澤擢平津。

和秦壽之題靖安棲霞觀

飛觀臨無地，江天在目。
中晚霞工射，日秋水欲浮。
空蓼岸深迷，綠楓林遠映。
紅歸歟，還可喜，千里一帆風。

夏日歸自寶林二首

十里招提路崎嶇祝聖歸青黃原上麥紅白草間薇正
看雲容合俄驚雨脚飛餘花被霑濕芳氣襲人衣

遠岫升初日長林霽曙煙峯迴遙見塔溪轉靜鳴泉竹
籊新披錦茅花欲擘綿清和多美蔭歸路得踟躕

和詹德秀出南汰二首

曉出東郊路春霖數尺泥湖山供勝賞花草覓新題坐
聽鳴鴻北歸看落日西乍晴何所喜芳樹早鶯啼

小沼鳴蛙吹虛堂墮燕泥對花容命酒書事喜分題僧

舍喬林北田家古道西鵲鳩晴喚婦穀穀傍人啼

題香巖與何希淵陳勉仲聯轡

市井三盤北招提百丈東晴雲披靉靄寒日弄瞳矓滴
瀝林梢雨淒涼蓋影風我慚追驥足策蹇走巴僮

東靈鷲

松蓋雨還偃雲扉風自關縱橫兩溪水高下萬重山入
室三彈指臨淵一點顏懸知少來往石笋綠苔斑

題石磧明因院用李端叔韻

楚漢干戈地，巋然見此山。
艱難思帝業，牢落漫禪關。
野鳥驚人散，江湖到岸還。
明朝又東去，空羨阿師閒。

題法輪寺

孤塔雲烟外，荒蹊草莽間。
蓼花紅糝碎，楓葉絳綃殷。
送客三溪遠，逢僧半日閒。
功名休覽鏡，淪落鬢毛斑。

題宣州書堂山寺

書堂形勝好，山轉與江拋。
泉古應黃蘗，亭新換白茅。
雨餘蒼蘚合，春晚綠陰交。
欲問香巖旨，風林竹自敲。

秋日遊南汰二首

小雨霑秋旱清曦霽曉氛山留歸壑水風送過江雲碧
瓦觚稜出黃茅兔徑分高僧似相喜茗飲話殷勤

松篁團野色葭蘆接江氛芳菊開新雨晴天掃片雲村
醪過寺共風袂轉山分邂逅梅夫子清談得致勤

次因上人韻

一從潛水別三見菊花黃舊好論交篤新詩引興長勞
生閒自笑道術淡相忘蝴蝶秋來懶時應到睡鄉

送浮屠善慧東游

西去方祈穀東來適佩萸淒風梧脫葉積雨稻生蚨詩
骨寒巖木禪心古廟爐莫將明月句容易謁姑蘇

送浮屠道郭雲游

何必素州去塵塵小釋迦一筇非外物四海即吾家曉
色霜還重秋容菊正華此行良不惡冬笋已排牙

和鞏興宗題回峯寺贈明山主

江共煙雲遠山連藪澤長日從三伏烈風借九秋涼休

作挑花觀卿同柏子香相逢無一事不必下禪牀

寧公新拜首座因贈

著書新奏御

上詔承旨蘇公道士韓德純與公集三教聖賢事跡各五十卷故有首座之命優

詔及禪扉首座名雖貴家山老未歸磬聲寒繞枕塔影靜侵衣終憶西湖上秋風白鳥飛

春日遊西塔示本上人

暇日搜奇勝羸驂適莽蒼幽花撩醉眼早麥慰飢腸佛屋幾間在村墟三里長
廡纖晚來雨未覺客心傷

欽定四庫全書

相山集卷九

宋 王之道 撰

七言律詩

春日書懷

野桃經雨爛爭華似促畦
丁種早瓜不見少年閒信馬
空憐寒士出無車泥融近水
芹抽葉地暖依牆薺放花
偶憶惠連春草句夜來竟夢
到天涯

高文知己動天庭昨日春雷
下六丁濟旱會施惟肖雨

舉賢先應少微星行趨北闕形神健坐對東風醉夢醒
連日暖烟隨處好吳山應勝越山青

立春小酌呈諸兄

共喜春隨曉色來東郊歡踴賽牛迴破寒青轉無菁葉
抵日紅抽芍藥黃歲換未勞驚我壯酒封聊復為君開
上林不負遷喬約百蟄同驚此夜雷

和伯父仲球立春即事二首

怪得青腰稍霽威却應緹室報飛灰搖風柳帶綠冰重

破凍溪流與岸迴，羣盜傳聞湖外去。
愁雲準擬歲前開，玉盤絲菜今蕭索。
賴有詩筒日往來。

對雪酬春付酒杯，兵餘真似復然灰。
路通千里傳書去，人喜三軍破賊迴。
梅萼封檀香未徹，湖聲撞玉凍初開。
踈籬敗屋休興歎，幸事羣兇不再來。

春日有感示魏定父

聚散時來不自由，相逢相別欲何尤。
韋臯況有三年約，陶穀端非一日謀。
殘角為誰驚曉夢，遠山多事惹春愁。

故園又作驪駒賦尚幸持觴為勸留

清明即事

柳逕挑溪碧草芳故園遙寄水雲鄉
老來轉使宦情薄春思頗增詩興長
教子文書容自勉逢人尊酒為誰忙
海棠却似憐衰朽依倚東風試晚粧

追和東坡送春和陳德夫

柳外風檣迅莫追柳間遲日弄晴暉
青春已作堂堂去烏轡何由緩緩飛
入戶呢喃輕語燕隔林呖軋靜鳴機

誰言四月芳菲盡萱草葵花覺昨非

鹿鳴宴

乾道乙酉無為太守呂公以冬十一月庚戌舉送
進士循舊典開鹿鳴之宴部使者梁公以建臺於
此而與焉呂公不鄙謂之道於是邦年齒最高實
為鄉老俾從觀禮之道自念頃在宣和甲申獲同
弟兄聯中科第迄今未見有繼之者士風不振甚
矣因作是詩記今日之集且以勉諸君是行聯名

春闈為時盛事大慰州閭之望

蒼顏華髮老書生來赴公堂宴食華曾預宣和聞喜集
重觀乾道計偕行繡衣勸駕追前哲熊軾賓賢繼列城
久矣邦人虛桂籍正須公等振英聲

秋日書懷

斷虹收盡晚風涼撲鼻誰家社酒香門外山橫青玉案
屋頭榴綻紫羅囊對吟已覺輸新俊遇酒還能發老狂
坐想西園梨棗熟昔年猶記拉君嘗

一別成均十九秋，斷腸千里致書郵。
可憐率土民心固，端為當年聖澤流。
此去會看還北狩，夜來先夢到東州。
尊君正是吾儕事，可但南冠學楚囚。

到齊何日醉青州？久矣平原困督郵。
避地未容行信步，汎江聊得卧安流。
望窮落鵲千山晚，夢斷驚飈萬壑秋。
安得尚方三尺劍，掃除驕寇獻俘囚。

對雪和馬大卿

投分江梅亦太清，尋盟風絮却多情。
勢先澤腹歸冰鑑，

氣迫毫尖入管城吏部夢踰秦嶺去將軍來作蔡州行
擁爐令我思前躅策蹇高吟愧孟生

對雪和因老韻

諫陛何人正伏蒲將壇無事且投壺因觀雪曲詞爭勝
便覺詩鄰勢不孤警鴈王師方入蔡贈梅邊使欲離吳
可憐鼠輩殊輕敵乃敢堂堂捋虎鬚

和張彥智對雪

雪山何處覓瞿曇壓盡江南瘴與嵐待伴可堪風作黨

交光應喜月成三濯巾漉酒供杯勺涉筆聯詩尚笑談
柳絮自今輕謝句使君才氣擅東南

苦寒

風屑瓊寒透薄帷擁裘端與火相宜煖迴熾焰身成直
撥到殘灰手欲龜贈炭尚誰憐正曜授薪還自愧支離
不甘力請從緇侶苦調寒窓強作詩

題合肥驛

予癸亥春三月嘗至此時兵火初過頗垣斷塹遠

望若荒阡破嶺所餘人亦無幾傍徨不忍舉目後
八年復來遶城秋草離離其青四合而市井舊通
闌帶闌處亦漸可觀為之感歎因用壁間李延仲
韻以識歲月紹興二年秋七月丁酉

重來歲月恍如飛但怪蕪城壁四圍千里漫推新政善
幾人能遂故園歸雲蒸殘暑催登穀風作新涼戒授衣
小驛滯留朋舊絕何妨白晝掩朱扉

題元發弟竹軒

竹林深處敞軒楹分我西園一半清
蒼玉幾番披夏籜
老龍長此戰秋聲
寒侵虛幌詩增爽
綠浸踈醺醉不醒
應許七賢追盛集
煩君書入鄙夫名

題時軒

圖書堆裏席凝塵
聊與時軒作主人
自恐謝安行不免
誰言陶侃困無津
東榮曉色高迎日
南圃花光得占春
想見戴侯風味勝
輕彈珠玉到江濱

題許公塞驛

遐想清游意欲飛
巢湖西畔碧山圍
高城別後騷人到
小驛春迴燕子歸
壁上新詩留醉墨
庭前飛絮點征衣
窮愁勿用頻惆悵
來歲而今在北扉

題無為秀溪亭

畫橋雕檻接招提
新有幽人榜秀溪
十頃淨明天上下
兩奩光映水東西
飛樓湧殿參差見
古木修篁咫尺迷
此景此時君信否
綠楊陰裏嘯黃鸝

憫旱

食貧那識小槽紅。回也簞瓢久。屢空翹候載。艾歌濟濟。
忍看雲漢嘆熈熈。困窮轉覺蓬心隘。憔悴猶憐菜頰豐。
坐對驕陽思霈澤。日占鳴鵲望穹窿。

為興國周少隱題

紫翠森攢面面山。箇中佳致為君還。憑闌人在風塵表。
落紙詩成咳唾間。良夜幸陪紅袖醉。清時聊伴白鷗閒。
籠紗歸去高城晚。凝翠堂東月滿灣。

為彭積甫題熙春堂

似聞伐石旋誅茅已見高堂蔭樂郊
百里湖山供眼界
滿城桃李動春梢
寒梅過盡看成實
乳燕飛來欲定巢
何日登臨閒信馬
路邊人復少年嘲

田間夜歸有作示王覺民二首

風雲蹤跡付扁舟
水竹生涯寄一丘
世故舉同鷄抱鵝
物情無怪馬生牛
百年半向愁中老
萬事常從酒到休
莫愛得官輕得句
爭如飽食對吟搜

江上秋來憶少牢
龜腸尤覺病詩饕
調和索似三分醬

瀕洞看如八斗糟水怪重增風勢惡湘靈難禁鴈聲高
何當一雨洗煙月為放清光歸我曹

寄題峽州楚塞樓

西陵舊有楚塞樓太史黃公魯直命名兵火之餘
掃地盡矣秦德久至而新之頃還舊親羣賢爭出
佳製爛然成編德久不鄙示予且索鄙句

江向西陵勢漸平萬山環合翠崢嶸須知楚國嘗為塞
不為涪翁浪得名人若此賢真俊傑樓還舊觀煥神明

臨風每聽灘聲咽似怨張儀作暮橫

和陶尉喜雨呈張文伯

賀客休辭酒盞深使君心是老農心
精誠已致當時雨膏澤將為異歲霖
得水槁苗俱競秀乘秋高鳥自能吟
宣風宜有中和作漫玉鏘金播八音

和王冲之喜雨呈張文伯

指點邦人著眼看魯侯雩祭正玄端
望來已見千山雨此去那憂百穀乾
高廩有期從穡斂犇霆何處起龍蟠

新詩得得書靈應傳與羣公好縱觀

和應資深九日游康樂園二首

村落瀟瀟晚吹生斜陽天際與林平黃花照眼吟肩聳
紅袖扶頭醉帽輕可憤探題仍擊鉢敢辭償令獨浮觥
相逢又復驚相別樽酒何妨意氣傾

里社安閒得久生金華端不羨初平山林應有清修重
軒冕還將道義輕詩捷口占那復藁酒豪盆酌不論觥
一斑已幸窺秋句困廩他時冀倒傾

春日郊行和郭希魯二首

紫風楊柳綠絲長，過雨桑麻沃以光。
聯騎不妨多載酒，看花無用更燒香。
望窮巖電搜詩眼，愁轉車輪感別腸。
勝集清游定何處，它年曲水記流觴。

坐對煙江疊嶂圖，何如門外翠屏紆。
尋芳敢擅攜筇去，命友應從折簡呼。
酒裏光陰閒活計，詩餘情思靜功夫。
浪吟痛飲真難遇，休問西山日欲晡。

和吳子美香林湯韻

泉沸鷄籠山下林，潯陽曾記尺餘深。
濯鮮淪卯非予事，清暑攘寒蓋我心。
物態漫勞私曖曖，靈源當信匪今今。
簿書汨沒塵埃久，附驥何時遂滌襟。

上巳日阻雨和王冲之韻

被除聊復對江亭，樽酒相從一笑傾。
那得此時仍此樂，況逢難弟與難兄。
潺潺暮雨簷間溜，滑滑春泥柳外聲。
好在海棠紅閣淚，向人悽愴益多情。

和實又勇秋日見訪阻雨見贈

風雨蕭蕭暮不休
頓添寒色送窮秋
已荒深院菊猶在
欲去短亭人強留
千里書遲空噪鵲
四隣砧亂混鳴鳩
相逢棊戰宜終日
卧稻從他爛不收

和石守道喜雨

夏旱逼小暑
種入土者十纔四五
而原隰龜坼
亦就槁
太守張仲文為民請禱
翼日片雲作環城
獲一溉之潤而大雨繼之
遠邇霑足
因觀石徂徠
喜雨之什
勉用其韻
且俾兒曹同賦
庚辰夏五月

庚子

坐聽簷雨快高吟酒到從斟不厭深酣戰遂符占蟻信
鬱興良慰望霓心一時與被堯天澤四海同蘇傳野霖
霑足豈惟秋有歲麥田猶及趁犁金

俗諺謂五月犁金
六月犁銀七月犁

土今尚五
月故云

伏蒙知縣縣尉二寮友以夏旱得雨賡石徂徠
喜雨韻見貺不可虛辱復嗣其韻書謝仍命兒

曹同賦

綠槐陰外聽蟬吟
節過分龍夏已深
千里亢陽憂歲旱
一時甘雨快人心
養禾不害連朝暄
沃暑應容數日霖
多謝同寮憐老拙
雙南佳句競鏗金

追和東坡張昌言喜雨呈同官

旱魃正須三尺雨
飛廉旋布四天雲
詩成采筆揮瓊玖
酒到醺顏散纈紋
蓮沼灩翻宵溜急
槐庭清送午風薰
欣欣千里農夫慶
衰病空慚老使君

和董令升舍人

雨餘沙路潤無泥
潄潄溪流與岸齊
苒苒年華催我老
酣酣春意得人迷
聯珠便覺新詩富
浮玉還聽雅唱低
楊柳緩搖陰正午
誰家籬落一聲鷄

和董令升舍人夢中得句

早晚天書下紫泥
如今人物擅三齊
才華好自鑒坡進
詩思休從蝶夢迷
深院日遲黃鳥轉
長橋風軟綠楊低
春容不用相撩撥
老去心情似木鷄

和張安國舍人

判花西掖妙當年曾見聲華振日邊
文翰共推唐李嶠
功名將踵漢韋賢江山到處供詩筭
風月多情付酒船
琳館正應聊爾耳會看鵬擊水三千

和張文紀詠雪二首

萬境沉沉夜氣嚴
廣寒初下水晶簾
三杯強沃澆腸酒
一捻聊分暖硯鹽
已恨梅梢遭挫折
可堪風物為般添
才高抑絮雖難到此語於今亦惡拈

朝來經閣課楞嚴
撩亂飛花競撲簾
似是青腰誇黑帝

故教姑射混無鹽地爐無奈貂裘薄斗酒難供座客添
詩債惱人眠不得夜寒殘管亦須拈

再和董令升雪二首

春雪初融作燕泥梅花零落杏花齊遙山掃翠雲初斂
芳草鋪青路欲迷別恨每憂兒輩覺老懷終為世情低
新詩價重連城璧敢比靈犀獨駭鷄

欲下閒庭不蹋泥但驚飛絮與堦齊一枝誤失禽棲穩
三窟遙應兔迹迷填塞澗溪還地厚壅培山阜覺天低

寒光照應東窓白
咿喔應先報曉雞

追和東坡嚴車二雪詩

公詩有意拂廉纖
令似歐陽韻更嚴
犬子亦應慚賦縞
癡兒端合愧誇鹽
飛綿勃窣爭平塹
凍笋搓牙欲墮簷
胡避口今何處是
玉屏森映一峯尖

雪滿江城酒不賒
閉門那患出無車
未容踏凍尋梅萼
應喜臨風見柳花
炭重烏銀爭曉市
蔬挑翠羽荷隣家
何人正下紅蓮幙
大嚼蒸羊手更叉

欽定四庫全書

集部

相山集卷十二

詳校官左中允_臣瑋五珠

主事_臣呂雲棟覆勘

謄錄監生_臣溫廷鑑

謄錄監生_臣朱起鳳

欽定四庫全書

相山集卷十

宋 王之道 撰

七言律詩

和周少隱實錄院對竹三首

夫子文章僕命騷
高標寧若歲寒凋
慣看雄辯朝揮麈
想見清吟夜度韶
老去荷君頻折簡
時來容我尚同寮
區區長倩何為者
不樂平原意本朝

老來鬚鬢白刁騷
猶喜丹心未遽凋
秋賦肯甘同宋玉

晝眠聊復繼邊韶
翩翩幽鳥隨風屐
炯炯寒燈伴夜寮
多謝故人珠玉寄
水雲堆裏望天朝

牕寒疎竹共蕭騷
可笑圓荷著露凋
實錄成書輝日月
奉常新樂奏咸韶
佳篇千里來青瑣
好夢連宵到綺寮
湖海固應聊爾耳
佇看丹詔下公朝

和韻寄董令升舍人

曾將燕石報瓊華
別後哦詩愧莫涯
空腹但看長柄械
緩行何用短轅車
神馳鄧步彌天葑
夢入朋谿夾徑花

何日天台尋藥去，女仙迎笑飯胡麻。

和余元明時元明邀余同李次元夜飲

坐中強半是同年，賴有斯人席更圓。
跨馬未須貪遠道，舉觴聊復望青天。
枯荷折葦三陂路，明月清風百丈船。
俯仰便成陳迹恨，須知此集不論錢。

避寇糝潭登李彥修延秀閣

王師千里下邦畿，三月宜新對敵圍。
江上扁舟隨處是，煙中華屋轉頭非。
逢人借問何時定，有客來傳二聖歸。

已辦笱簰學元結卜隣猶冀不相違

和因上人午睡韻

多謝高人問起居
惠然相過共秋蔬
栖栖衆且疑夫子
碌碌誰知效阿奴
老去睡鄉還積欠
君來詩社責新逋
便便一覺南窓午
短簟方牀意不踈

歷陽寄定城尉彥逢弟

故園鵲鳩久催耕
休戀公田秣與秔
別恨久隨黃耳去
歸心應望白雲生
干戈叢裏三書考
春夏交來幾閉城

我亦藍田負丞者相從何日賦淵明

和蕭山臨川亭壁間留題韻

水外峯巒碧四環雨多門徑蘚苔斑
滯留又及炊新粟
歡喜何當見舊山招隱有詩來
書上倦游無夢到雲間
西興十里秋潮晚坐數扁舟帶月還

和彥逢弟春日即事

楊花如雪菜花黃路出初郊正日長
喜對新詩醒病眼
會逢膏雨沃驕陽過僧竹院茶爭美
酌客山堂酒倍香

常恨抗塵仍走俗不知身在水雲鄉

和陳勉仲春日偶成二首

帷幄何人正坐籌匈奴輕漢索懷柔回鑾未覩迎天馬
勸穡還驚出土牛雨過池塘新漲綠春歸原野霽煙浮
中興自古須羣策更願君王慎厥猷

江表歸來得自由舊鄉能復到溫柔辭源已見流三峽
筆力當期挽萬牛白日忍從黃霧塞青天那復黑雲浮
掃除驕寇還強漢會有忠良告遠猷

春日偶成

餘生今赴邇英朝似說夔龍許續貂
枯拚遂承新雨露蒼鷹應識舊雲霄
廢興須信闕時命勞逸誰能問貫條
十載山林勞夢寐五更天仗聽簫韶

春日次韻張叔元

遲日輕風過雨天草青南陌欲生烟
江湖節物登王籟村落歸心起杜鵑
已辦尋芳游野寺何當修禊泛溪船
路逢少婦携籠去為說蠶兒向雨眠

和秦壽之中秋翫月三首

一樽芳酒起沉烟絕勝紅裙擁後前
山色水光相上下月華秋氣共清圓
佳時令我思韓愈好夢逢君想惠連
老大不知追逐樂却因妍唱惜流年

湖光無際接雲烟舉酒登臨夕照前
坐送落霞還杳靄倚看明月上高圓
清談浩渺河源注麗句縱橫繡段連
歸去鳳池知不日山城岑寂記今年

腸斷江城斂暮烟一聲清笛短亭前
揚舠共喜風初轉

戲綵當期月正圓
水落雙溪和石出
霜餘疊嶂與雲連
令人暗想昭亭路
屈指歸來又四年

和張彥智中秋對月

萬里青天霽色開
嫦娥駕玉上雲來
樓中勝飲八仙聚
物外清談三語該
空翠水光爭滉漾
漏聲鐘韻共徘徊
秋盤應愛金櫻好
紅抹佳人醉裏腮

和高守無隱官閒卽事

老去空悲樂事稀
百年渾醉幾多卮
雖貧賴有舊栽竹

縱嬾未容全廢詩碧草望迷烟漠漠黃梅看熟雨垂垂
莫嫌蕪艸晚相浼欲換邦君白雪詞

誰憐村落笑歌稀全把茶甌當酒卮枯槁又經三月雨
窮愁聊付一篇詩牕間遠岫青千疊樓外長天碧四垂
何日獲陪文字飲欲翻妍唱入新詞

和胡德輝增明軒

釣魚聊復效詹何肯向青山較少多身世自憐巢幕燕
利名誰鑒撲燈蛾風前逸氣舒長笛酒裏清愁到短歌

安得梧桐來鸞鷟一鳴千古繼卷阿

寄奉符大有叔

血氣侵凌不復豪往來歌倒似乘濤寧知嬾過嵇中散
亦有詩如謝法曹舊藁只堪供醬瓿故人相贈有綈袍
兖州賓主同風味惡句煩公更一嫖

和曾式古

式古省幹當高使君守濡湏日實為幕中之賓罷
既踰年而兵餉有積下供給錢數百千未請欲以

為歸資情見乎詞成唐律三章以示同寮僕偶獲
觀焉韻險不能盡和姑和首章以當贈言

白雲飛處見層巔回首風檣去若仙
舊隱已鋤三徑菊新吟聊想一囊錢
春歸沂水還相樂秋到盱江盛有年
更著綠衣歌且舞高堂侍瀝奉周旋

和何希淵韻

敢負交游素所期自憐衰滯使君疑
向來兵火亦何久此去功名應未遲
詩似清風宜我慰心如白水欲誰欺

扁舟儻赴相從約江北江南笑有辭

和孔純老歸自屬邑三首

純老通判歸自外邑聞守將宿有攜妓郊勞之約
途中以詩督之且蒙不鄙示予謹次韻一笑

行縣歸來賦陟岡青梅應快一樽嘗詩成妙墨揮張聖
酒到高歌發楚狂夾道野花園步障兩行官妓簇橋梁
嗟予貧悴踰蓬華不及郊迎笑舉觴

往來陰雨恰彌旬滑滑那堪鳥語頻行色可無三日霽

旅懷應付萬家春
欣聞郊勞開瑤席
想見車旋入錦茵
何幸詩筒時寄我
慰懷須信有詩人

詩濤難放筆頭乾
歸及初晴素魄圓
善譽敢論當世比
佳篇應任老夫傳
凌雲列岫堆螺髻
出水新荷點翠鈿
報政還朝知不晚
追隨能復記當年

和梁宏父二首

時來談笑取侯封
清曠寧容雅志從
上聖急賢齊舜禹
羣公引類邁夔龍
非材似我十圍櫟
有用如君千丈松

邂逅相逢辱傾蓋能令瓦釜配黃鐘

功名須向壯年收顧我摧頽已白頭節晚獨存松柏勁
歲寒還見雪霜浮老將耄及從人笑醉欲眠時遣客休
眼力尚能觀細字詩筒經卷且優游

走筆和孔純老催詩債次韻

閉門對客總言詩淹速由人敢預期思若湧泉誇往哲
文如翻水擅當時年成定見爭稱善月鍊懸知鬪出奇
疾似枚臯何足道漢朝終貴長卿遲

魯直云閉門索句
陳無已對客吟詩

秦少遊年成見左
思月鍊乃許洞

避寇婁山

山前湖水抱烟村湖外山光隱若存
泛宅浮家聊自託
蔭松藉草欲誰論
物情魚沫真堪笑
世事槐安不在言
回首故園煨燼裏
歸歟猶勝傍人門

和鄒進士

望外青山便到家
馮讜何患出無車
坐逢石鼎應聯句
篋有龍潭敢鬪茶
樽酒幾時同竹葉
功名終日鑒菱花

君看一雨蘇羣搗所至人心樂否耶

和丁景仁三义河留題贈李仲山

飄零雙鬢已星星萬里江湖寄此身
山擁青螺初洗雨水浮蒼壁似圍春
別來興廢同千古此去榮枯會一新
葭蘆彌天草如積寬予猶賴有斯人

弟子厚自相山徙居湖塘又復一月矣距外除
只數日間光景漂流徒成感慨讀新詩興不能
已輒和韻

相逢休訪楚江萍我老無能一壯丁卜宅又驚三決日
御琴空感再周星新愁外酒心先醉氣怯春寒夢易醒
却喜故山遙在眼舉頭時見竹青青

和李難老

半生場屋弄朱衣猶喜春來破白歸同輩交游惟我拙
一時人物似君稀風神要在山庭峻辭吐初疑鋸屑飛
州縣未應淹驥足釣名誰羨子陵磯

和張公儀

醉中行草館秋蛇十載風櫺憶舊家朋舊亂多從鬼錄
詩書閒益富生涯稻塍綠合迷秧馬沙嘴潮回下釣車
歸去西疇新雨足飯杭應不羨胡麻

和趙積中

入室芝蘭氣不殊逢君還憶見君初梅花正喜春懸鳳
藿葉俄同夏鱸魚下榻舊聞看孺子負荆誰復謝相如
艱難正詘平戎策及早東游叩帝居

和江和仲

把讀新詩憶舊家
深村羸犢短轅車
年豐野老常携酒
客至幽禽自喚茶
亂後所存惟五柳
老來無意約山花
相逢何必曾相識
乘興時來過此耶

和張元禮

元禮以蘧著蘧三子下第未歸有詩寬予因用韻
勉諸子非獨為下第者設也庚辰清明後一日

力學三年看有成
龍蛇蟠蟄冀存身
一杯餞別初迎臘
千里歸來欲送春
愛日光陰宜共惜
及時德業要爭新

吾家叢桂風流在速取高科慰老親

和閻必志見寄韻

老矣詩才欠壯觀羨君閒燕富清歡染羹早厭誇龜指
食肉應宜謝馬肝送客篇章堪寄遠論文杯勺自驅寒
扁舟近過池頭否百丈西南水欲乾

和陳勉仲二首

人似平原字亦顏詩成長在笑談間試看落筆雲烟疾
難放搖春草木閒美俗未容窺製錦勸耕聊得伴行山

慚將鄭腊酬荆璞無怪年時債未還

相逢憐我太哀顏冰雪精神照座間
霽日有情茶乳合春風無力柳絲閒
肯從逋客來三徑祇恐佳人賦二山
舊說毛公今見否似聞新向玉京還

和魏定父被擻還無為

定父通判被擻來歸旦夕當還安豐
距重陽不數日方茲戲綵而遽爾言
去想不能無戀戀因觀所和因格非佳
句歎服別來詩格超邁不能自己次

韻

雨脚廉纖日脚微秋陰猶暗北山陞莫言巖壑都無用
須信風雲會有期邂逅醉鄉還自適周旋詩社好相規
黃華又報重陽近想見遲遲去魯時

和孔純老按屬邑二首

高車西去忽踰旬坐想登臨得句頻楊柳陰交山徑晚
醪醖香滿驛亭春吟餘掃壁時揮翰醉裏投牀任吐茵
聞說歸來歡喜甚故人相遇是詩人

楊柳依依半掩扉
新晴踈影弄斜暉
好花覓句忍輕負
幽鳥勸沽良重違
閒愛青苔綠砌上
靜看蝴蝶撲窓飛
雨多不覺蕪菁過
又喜盤中筍蕨肥

和許端夫兄第二首時端夫出守當塗

燈火當年記馬行
一時人物玩垂裳
舊游亂後半蕪沒
新貴邇來多罪亡
我有墳茔相應和
君同蘭玉競芬芳
高文已見含元賦
不用研思古戰場

相喜何須日寄聲
如君無處不知名
縱觀妙墨雲烟動

想見新詩欬唾成帶雪山川增綺麗向春梅柳自欣榮
好將十詠圖歸去穩步花輒繼李程

和索望回

千古風流憶孔明老龍高卧志存身強陪簪紱更三聖
安坐江湖又四春便合癡狂稱達者誰能窮悴作騷人
一杯聊復從公醉要見予言總是真

過鄧步和張叔元見贈韻

獨舸東來夏日長歸裝從此益生光卧雲禾穗珠成實

傾露荷花麝被囊逸世才猷金駟裏逼人風味木蘭堂
常疑正始遺音絕把讀新詩遠壇場

夜泊官牌夾口大風追和陳去非歲晚感懷

咿喔鄰鷄夜向闌曉風驕挾曉霜寒吹燈強取殘書讀
撥火重尋遠信看綠蟻已應浮臘甕青絲行復送春盤
旅懷欲倩高鴻寄憑仗新詩付筆端

和張序臣合肥驛中詩

橐臯何處合肥東知有詩翁杖履中魯會一時歸寂寞

吳吟千載發清雄
湖山照碧勝
臘日鞍馬欺寒料峭風
春入花梢人易感
莫教房闥歎飛蓬

長至和魏公達

半夜迎長坐候明
眼看初日屋山平
詩豪不共年俱長
鬢雪惟應老自生
得酒人情何太喜
犯寒春色不多爭
老農相慶無它語
盡道冬晴好趣耕

和孔純老送司法吳德聲

舞腰迴雪奏伊涼
餞設鈴齋舉別觴
如子固宜傾坐客

卷十
顧子何計挽征艎交情舊喜推東道歸夢先應到北堂
花柳枝頭春已闌佇觀超擢寘周行

和方景南參議見贈

向來疎率任天真此去扶持護善鄰只恐磨礪難作鏡
已知行水戒推輪簞瓢本是吾家物軒冕寧容我輩人
多謝諸公共推轂欣欣寒谷暗生春

和彥時兄韻

立馬山前問酒家
峯森列兩溪斜扶疎新竹聽流水

天矯古松看霽霞遠目自能供覓句枯腸終不索搜茶
一杯湯餅東牕晚危坐清吟對月華

用李夢發韻

夢迴詩思不勝清卧聽幽禽兩嚙更窓角界金分月色
山腰鳴玉漱溪聲欲行且住心還適久雨新晴眼倍明
莫為浮名廢真賞較來何重亦何輕

梅隱亭

無慮無營得自如亂紅狼籍綠陰初莫貪視盜誅鋤術

輕換齊民種蒔書風物最憐清且好賓朋那患數斯踈
高談亶亶還終晷坐覺庭花影上裾

麗澤堂

焚香讀易欲何求只恐西鄰未識丘千里交遊思命駕
一龕燈火喜逢秋胷中雲夢應無筭天上風雷得遍搜
莫向明時老巖壑伊周元不羨巢由

能賦臺

萬頃玻璃水浸空臺前佳色詠難窮倚欄人在烟霞外

落筆詩成笑語中屬句畏慚非孟子供歡端合有車公
解將能否分優劣過眼昭然向與雄

代人上段拂叅政

玉牒書成已六年東游曾記此周旋千齡令慶亨嘉會
二府新分造化權咫尺雲天依日月斯須霖雨浹山川
應憐汨沒塵埃者白髮青衫走道邊

欽定四庫全書

卷十

欽定四庫全書

相山集卷十一

宋 王之道 撰

七言律詩

江南道中

江迴山崦兩三家招飈東風酒旆斜
羸馬送曛行自急峭寒欺客晚還加
日邊鴈足應傳信竹外梅梢合放花
指點東城歸路寫一川流水鬧棲鴉

隱靜道中

馬頭聊復問諸塗東指宣城百里餘
水外山屏供步障
道傍蛙吹接行車青歸柳色浮烟裏
紅入花光過雨初
春意似同人意好此行那患食無魚

寄余元明

對月令人憶子年別來重見望舒圓
閒中情性南無界
物外光陰小有天連喜得官如得句
慣看乘馬似乘船
朝迴共醉知何日準擬春衣當酒錢

寄孫次卿

歸來啜菽得無愁但覺官身不自由敢倩雙魚傳尺素
要知一日似三秋射陽別後從新辟幽谷公餘獲勝游
尚憶龍盤分袂處五更殘月在山頭

次韻高守無隱苦熱

鬱蒸還起砲車雲旱氣方隆雨未能應念開幃來白鳥
故成灑酒聚青蠅南皮痛飲君當繼北牖高眠我獨醒
人仰郡侯清可倚暑中真是一條冰

用東坡贈晁新城韻呈朱烏江

偶然來賦瓦梁行亂後欣聞醉客聲村戍火明人指路
江城風靜夜鳴鉦對牀聽雨他時念撥火哦詩此意清
聞說魚軒還枳里先生應合暫歸耕

和連聖舉呈張彥智

公望巖巖映廣東曲江重見舊家風威行草木霜爭肅
春到湖山雪自融至喜此心魚鳥共去思前日吏民同
從今不復憂兵火却敵如公笑語中

次韻伯遠運幹見寄

善鄰雖幸借餘光終愧陳臻問發棠官柳又驚眉拂翠
宮梅應喜額塗黃江湖得計還相造道義論交付兩忘
多謝乾坤容長物許乘春意到文昌

次彥時兄苦旱韻

斗粟衡門且自安老來筋力厭辛酸官游動是三年別
邂逅應容一笑歡荷浦珠聯秋露溢稻田龜坼暑風乾
昨朝溪足捐新雨已覺羸軀怯夜寒

次韻沈元吉兵火後初食羊

時難盆甌久無續夢寐何郎食萬錢一臠乍驚肥粃美
五純應喜漱裹全好從牛炙論蓴菜堪笑河魴詠柳綿
彈缺得魚良不惡先生何用鄙烹鮮

次韻陳勉仲二首

蜂喜春晴競出籠雪明籬脚眼看融柳條借日還金色
梅夢因風動玉容窺牖數聲禽度曲過庭千字鴈書空
青氈笑指吾家物芳草無邊一望中

十載窮愁鳥出籠春來天意似通融得書故舊頗相憫

上疏朝廷應見容
開府莫辭金帛盡
犂庭當冀稂氣空
廟堂素定平戎策
不待文淵在目中

次韻張進彥見寄二首

坐想雲烟走筆端
夜哦佳製老忘寒
一時思致追長慶
千載風流識建安
接武尚稽班玉筍
昂霄終合待金鑾
自憐衰退無新語
捧腹還君醉眼看

鼻息齁齁盡日眠
從他兒輩競嘲邊
那知問對成中說
自得逍遙喜內篇
雪裏書來簷噪鵲
燈前詩就鼎凝煙

中郎去後人難繼漫詫柯亭富笛椽

次韻同舍李支使夢與二首

三紀橋門過隙光醉吟曾共晚風涼
舊游何在已蕪沒
前好欲言空感傷
重對詩囊開錦繡
要看談麈落冰霜
苔溪此去如相憶
雙鯉時應寄一行

短短燈檠便且光
看書猶記感秋涼
飄零未遂襟期遠
遲暮徒驚歲月傷
初喜嫩荷青直蓋
不知新竹粉儲霜
相從益覺交情篤
時擲隋珠到我行

次韻周子嘉詠雪

勢凌風力鬪清嚴，徹骨尤非老病堪。
凍蠶夜回千首北，寒梅朝放一枝南。
扁舟底事方行役，販履何人正立談。
江上別來勞夢寐，相寬猶喜見詩三。

詠雪

白榆風起匝天來，透隙穿簾醉眼開。
氈毼庭階茸妥貼，帶盤山徑玉縈迴。
根行萬國將宜麥，香動千林獨放梅。
閒把銀杯評柳絮，始知謝女亦非才。

和彥時兄臘雪六首

不耕何敢嘆無因，多謝先生早見傾。
望歲比同傷再潦，逢年今共快三靈。
光凝夜旦千山曉，勢合高卑萬壑平。
坐想袁安門未掃，洛陽誰復念孤惺。

一洗乾坤不動塵，瑤臺銀闕鬪清新。
齋腰欲究安心法，乘興當為訪戴人。
暝暝寒江歸釣艇，丁丁虛谷動樵斤。
二詩遠比幽蘭勝，擊節懸知衆所賓。

敢以簞瓢傲廩圉，撇醅聊復笑還傾。
為言空腹朝搜句，

不覺寒牕夜集靈澤決寰區成地富光生蓬華見天平
預占有歲從今始廊廟何憂不及惇

瑤林交映出風塵便覺寒門氣象新莫訝窓前羣噪鵲
須憐江上有歸人拋輒已喜來荆璞斲聖無勞運郢斤
坐擁紅金饒大嚼一時高會幕中賓

厭聞飢雀噪空困猶喜茅齋未遽傾屑玉豈勞青女送
飛花聊混白雲靈預占歲稔矜祥舊不擇貧家荷施平
早晚林梢掛寒日為迴和氣慰饑惇

舉首西風漫障塵清無纖翳六花新謝庭擬似吟飛絮
洛浦飄飄見麗人漏箭不知樓外曉觥籌先發坐中春
兔園盛集應難繼空想當時主與賓

次韻孫興宗梅花

厭浥庭柯雨未乾乍晴天氣午猶寒傳來多謝新詩寄
接得翻愁病眼看漫想素粧嫌粉浣須憐青子着枝酸
和羹有日君知否老大心腸只自寬

次韻董令升梅花

花前樽酒瀉興泥痛飲仍欣客到齊
竹外一枝青更好
水邊踈影動還迷
醉醒正值微風入
酬唱何妨素魄低
聞說歸舟陽羨去
應容酌別為烹鷄

詠梅示魏吉老

孤芳常恐百花知
桃李紛紛亦強追
照雪精神應自喜
逼人風味不吾虧
幽香隱約留衣袂
踈影玲瓏鑒硯池
欲識東君好消息
夜來青鳥宿南枝

次方正叔知縣韻僕今年六十有三竊觀正叔贈

陳甥述懷詩有感予心併和二首奉呈

年踰六十我何堪
心曲因君得縱談
閑史舊嘗疑夏五
參禪今遂薦前三
飲闌却怪清樽惡
飢甚猶憐糲食甘
交態物情何足較
邇來爐鼎興方酣

水滿陂塘麥滿村
路逢田父和長言
題詩懶作蠅頭字
貰酒愁看犢鼻禪
芳草藉青迷野迳
遠山橫翠入柴門
道衡骨朽無人繼
卿相誰能預識溫

和張詠老知縣

照部輝輝碧夜光
貧兒那復苦悲涼
得魚始信筌無用
斲至終期鼻不傷
我類槁苗猶欠雨
君同脩竹飽經霜
詩成病眼昏加澁
欲寫還憂細作行

臘梅和次韓韻

一枝橫亞竹梢黃
宮樣新翻半額粧
閒淡似宜冬後日
清癯應怯夜來霜
生憎丹臉嬌含酒
巧妬冰肌冷透香
取蠟爲花緣底事
浪吟空發少年狂

可憐風骨肖梅英
試問東君曷似生
正色不從朱粉澆

耐寒猶怪雪霜輕
論交蔭菊君為勝
投社醪釀我更清
縱美詎能齊衆口
漫言異日許調羹

夏月自六安舟行還安豐

灩灩溪流漲淥波
乍晴天氣自清和
露梢抽翠交新竹
風葉翻紅飈嫩荷
水外遠山晨霧重
道傍佳樹午陰多
頭旋更苦舟搖兀
說與篙師住得麼

和州得旨移粟宣城舟中和何希淵韻

轍魚應怪決江流
千里重為疊嶂游
頗慣黑甜相對美

可無赤糴為寬憂，干戈在眼心還折。
勲業何時鬢早秋，已辦賣刀歸買犢。
不妨多種白江州。

沙窩道中

疊疊青山處處溪，溪聲淙玉漱玻璃。
懸知菊水人難老，可信桃源路易迷。
山嶺梅花迎客笑，路傍松蓋與雲齊。
寒林昨夜微經雨，新跡分明過虎蹄。

遡流入柵江

久客心腸怯遡洄，不堪官事緊相催。
踏霜人去纒風吼。

衝浪舟行岸凍開雪盡野梅紅剪臘春迴溪水綠生苔
窮愁好逐殘年盡三日元正與泰來

春殘次韻張叔元

亂紅狼籍紫苔斑簾捲東風雨脚殘蜀酒漸宜消晝永
單衣猶覺怯朝寒玲瓏有客雙搖轡矍鑠何人一據鞍
芍藥酴醾晴更好勸君休作夢中看

次韻徐伯遠木芙蓉

千林搖落見孤芳銷得詩人賦拒霜高壓菊花還獨步

靜窺池水試新粧
自憐衰病追歡懶
忽覩騷吟引興長
何必採江重比並
佳名艷色正相當

次韻子厚弟小春偶成

強挿梨花做小春
風前詩思有餘清
路逢野老那知姓
耳聽幽禽自喚名
歲晚山林松檜色
天寒闌塞鼓鞀聲
枕流漱石君無笑
我欲巖居學子荆

次韻程德遠登清淮樓

西望中原懶轉頭
十年空見水東流
塗山漫想諸侯會

濠上聊追二子游
大劍長刀秋正擾
淡烟疎雨暮還愁
誰能不討清河朔
誓揖當期祖豫州

秋興八首追和杜老

湖外干戈半綠林
湖邊葭蘆晚森森
風霾未放遠山出
嵐氣又連淒日陰
世亂且同吟嘯樂
時來終快掃除心
天寒況是開爐近
應有佳人賦藁砧

曉巖石壁半欹斜
茅栗叢中菊漸華
風裏斷鴻書帶草
山頭飛葉漢浮槎
杞樓索莫吟秋笛
戍火青瑩咽暮笳

爭似漁翁最蕭散晚來和月卧蘆花

雲影矇矓日洒暉金湖西畔晚陰微漁舟繚繞青山去
楓葉追隨白鳥飛摩詰家風非世有淵明心性與時違
近來病瘠連詩瘦翻愛西臺字樣肥

轆轤世態一枰碁銷得秋來宋玉悲舒嘯可無元亮意
哦詩如見少陵時江湖於我還蕭散田舍從他笑重遲
異域故人今在否青燈牢落夜相思

翠壁蒼崖水外山山頭茅舍兩三間夜窻明月來臨卷

畫戶清風為啟關霞綺障秋驚老眼酒紅潮面發衰顏
集英一夢如今覺猶憶當時曉起班

遠水西來抱鹿頭山前草木帶霜秋黃花雅意撩詩興
紅葉端能寄別愁日月奔馳雙轉轂江湖漂蕩一輕鷗
干戈未戢中興沸蹴被空懷祖豫州

勲業休煩付考功此生終待老山中宦情薄似賢人酒
詩思清於少女風秋雨養肥桑耳白溪流濯出柳鬚紅
不堪世路頻硤确四十蕭然禿鬢翁

迢迢山勢去委蛇林木東頭見荻陂疎竹依巖秋迸筍
病桑經火雨生枝草侵藥種多難辨土撥松苗欲自移
照眼誰家幾枝橘出籬丹實正離離

送許判官志仁

同安許志仁與予比郡聲迹相聞紹興八年夏始于武林獲有

一面之幸而未款也前賈茂德將命淮東志仁方待次澧陽以文字見傾蓋若舊遂聯轡還無為今茂德復使江西而澧陽闕在數月間茂德自南昌遣舟來迎予方幸承教遽爾語離不勝悵然因志仁有春晚偶成佳句輒嗣韻贈之

是行猶及豫章春聞說逢迎有故人傾蓋為君殊快意

摻袂令我重傷神向陽花木初開葉得雨蛟龍已轉身
江上新晴應更好綠楊如幄草如茵

送董令升舍人歸朋溪二首

西掖歸來鬢未華著書論字當生涯撐腸何止五千卷
溢篋定踰三十車秋露青黃新種橘春風紅紫舊栽花
東還貪逐朋溪樂只恐金鑾詔草麻

僊舟東去訪金華歌徹驪駒向水涯試問玉堂司鳳詔
何如蓬島駕雲車雨餘翠篠初翻箨風暖丹葵欲放花

天氣清和行色好江南江北半桑麻

送劉元發歸鄱陽次其韻

杖藜千里訪茅茨來赴當年一笑期
白髮我徒悲老大青山君尚記艱危
夜聽高論因忘寐晝味新詩可療飢
冬日迎長殊可愛何妨去國少遲遲

送淮西轉運判官李彥恢還朝

江頭旗影弄青紅似說朝天四牡東
抱病不容攀轡勒送行那復遣兒童
田均稅斂千年利福及瘡痍九郡同

此去定知還禁近從來陰德報宜豐

送徐次公罷歷陽任歸三衢

聞說家書賦鵲歸歟難弟見難兄接聯本作二年調
解印俄成千里行故國一犁春雨足長江三板暮潮平
爛柯況是神僊宅招隱詩成好寄聲

送徐季公運幹罷任

羈栖無奈老而窮又見徐卿馬首東快意一時荷葉雨
增明千里稻花風高材合在雲霄上勝處能忘澗壑中

法護相從如問我為言蹤跡與君同

送端溪尉張達城挈家南歸

年時蕭寺雪初晴聞道君來眼倍明
送別又看秋欲去論交還感蓋初傾
帆張須水秋潮漲路入鉛山晚翠橫
快向端溪從吏隱歸來穩步上蓬瀛

送江致遠歸建昌

翩然歸興不吾留應為高堂念遠遊
數日語離良作惡幾時書到得無愁
白沙翠竹千山晚朱實黃花萬里秋

後夜西風茅店月醉吟應不費冥搜

房陵秋日

新詩來處自房州已及瓜時嘆滯留曾望碧雲頻送目
又驚紅葉再敲秋千山不隔清風遠兩地應同素月流
游刃似君誠利器只今無復見金牛

中秋和彥立兄韻悼伯父仲球

月華秋氣共清圓千古佳時句一聯節物傷心還惓惓
山光經雨自涓涓潢池兵火今方熾溝壑飢羸正可憐

招帳去年人已矣亂離誰復問招延

